

दिनांक 31.07.2024
समय: 18.45 बजे

आकाशवाणी जयपुर-अजमेर
प्रादेशिक समाचार

- हरिभाऊ किसनराव बागड़े प्रदेश रा राज्यपाल ओहदा री शपथ लीनी- ओम प्रकाश माथुर सिक्किम अर गुलाब चंद कटारिया पंजाब रा नुवा राज्यपाल अर चंडीगढ़ रा प्रशासक रा तौर ऊं शपथ लीनी।
- केन्द्र सरकार बीएसएफ मांय कांस्टेबल रा ओहदा माथे भर्ती सारू पैली वाळा अग्निवीरां बाबत् आयु सीमा मांय तीन साल अर शारीरिक दक्षता परीक्षा ऊं छूट देवण रो फैसलो कीनो।
- जयपुर ग्रेटर नगर निगम हलका मांय कोचिंग संस्थानां री जांच सारू समिति बणायी ज्यी।

अर

- राज्य मांय न्यारी-न्यारी ठौड़ां बिरखा-ऊगणी अर उत्तराद जिलां सारू ऑरेंज अलर्ट जारी।

000

श्री हरिभाऊ किसनराव बागड़े ने आज सिंज्यां जयपुर रा राजभवन मांय प्रदेश रा राज्यपाल ओहदा री शपथ दिरायी ज्यी। राजस्थान हाई कोर्ट रा मुख्य न्यायाधीश न्यायमूर्ति मनिन्द्र मोहन श्रीवास्तव बागड़े ने राज्यपाल ओहदा री शपथ दिरायी। श्री बागड़े हिन्दी मांय ईश्वर रा नाम ऊं शपथ लीनी। मुख्य सचिव सुधांशु पंत राष्ट्रपति द्रौपदी मुर्मू कानी ऊं जारी करी ज्यो राज्यपाल रो नियुक्ति वारंट बांच र सुणायो। शपथ लियां पाछे राज्यपाल बागड़े ने राजभवन मांय गार्ड ऑफ ऑनर ऊं नवाजी ज्यो। ई मौके मुख्यमंत्री भजनलाल शर्मा, विधानसभा अध्यक्ष वासुदेव देवनानी, उप मुख्यमंत्री दिया कुमारी अर डॉ. प्रेमचंद बैरवा, केन्द्रीय मंत्री, राज्य मंत्रिमण्डल रा सदस्य, विधानसभा मांय विपक्ष रा नेता टीकाराम जूली अर जनता रा दूजा नुमाइन्दा, न्यायाधीश, प्रशासन अर पुलिस रा आला अहलकारां समेत कई मान्योड़ा लोग ई मौजूद हा। शपथ लियां पाछे राज्यपाल खबरनवीसां सागे बातचीत करता थकां वां री प्राथमिकतावां बतायी।

.....

श्री ओम प्रकाश माथुर ई आज सिक्किम रा 16 वां राज्यपाल रा तौर ऊं शपथ लीनी। गंगटोक रा राजभवन मांय राख्यी ज्यो जळसा मांय सिक्किम हाई कोर्ट रा मुख्य न्यायाधीश बिस्वनाथ सोमदर वां ने पद री शपथ दिरायी। पैली वाळां केन्द्रीय मंत्री संतोष कुमार गंगवार आज झारखण्ड रा राज्यपाल ओहदा री शपथ लीनी। गुलाब चंद कटारिया आज पंजाब राजभवन मांय पंजाब रा राज्यपाल अर चंडीगढ़ रा प्रशासक रा तौर ऊं शपथ लीनी। इण ऊं पैली वे असम रा राज्यपाल हा।

000

सीमा सुरक्षा बल-बीएसएफ मांय लारला पांच साल मांय 54 हजार 760 जवानां री भर्ती करी ज्यी है। गृह राज्य मंत्री नित्यानंद राय आज राज्यसभा मांय एक लिखित जवाब मांय आ जाणकारी दीनी। वे बतायो के लारला पांच साल मांय बीएसएफ मांय सात हजार 372 नुवा ओहदा बणायी ज्या है। मंत्री कहयो के बीएसएफ मांय दस हजार ऊं बत्ता ओहदा रीता है। राय बतायो के सरकार बीएसएफ मांय सिपाही रा ओहदा माथे भर्ती सारू पैली वाळां अग्निवीरां बाबत् खास प्रावधान कीना है।

वे बतायो के दस फीसदी ओहदा पैली वाळा अग्निवीरां सारू आरक्षित राख्यी जावेला अर वां ने आयु सीमा मांय तीन साल री छूट अर शारीरिक दक्षता परीक्षा ऊं छूट दी जावेला। अग्निवीर योजना रा पहला बैच रा उम्मीदवारां ने आयु सीमा मांय पांच साल री छूट दी जावेला।

00000

जनजाति क्षेत्र विकास मंत्री बाबू लाल खराड़ी आज विधानसभा मांय बतायो के जनजाति हलका रा छात्रावासां मांय वार्डन शिक्षा विभाग ऊं प्रतिनियुक्ति रा आधार ऊं लगाया जावे है। वे साफ़ कीनो के वार्डन रा टी.एस.पी. हलका रा रहवासी ने ई वार्डन लगावणो जरूरी नी है। जनजाति क्षेत्र विकास मंत्री प्रश्नकाल रे दौरान सदस्यां रा सवालां रा जवाब दे रह्या हा। विधायक फूल सिंह मीणा रा मूल सवाल रा लिखित जवाब मांय खराड़ी अनुसूचित हलका मांय विभागवार मंजूर करी ज्या अर खाली ओहदां री जाणकारी सदन रा पटल माथे रखी।

000

जयपुर ग्रेटर नगर निगम हलका मांय कोचिंग संस्थानां री जांच सारू एक समिति बणायी ज्यी है। ई बारा मांय निगम री ओर ऊं आज हुकम जारी करी ज्या। जांच रो मजमून बणायी ज्यो है जिण रा आधार ऊं जांच करी जावेला। ध्यान जोग है के दिल्ली मांय व्ह्या वाक्या पाछे राज्य मांय ई प्रशासन सावचेत व्हे ग्यो है अर महापौर डॉ. सौम्या गुर्जर काल ई बारा मांय जांच कीनी ही।

000

इंदिरा गांधी राष्ट्रीय मुक्त विश्वविद्यालय इग्नू जुलाई सत्र ऊं कृषि व्यवसाय मांय एमबीए कार्यक्रम री शुरूआत कीनी है। क्षेत्रीय केन्द्र जयपुर री वरिष्ठ क्षेत्रीय निदेशक डॉ. ममता भाटिया बतायो के ई कोर्स रो मकसद खेती-बाड़ी रा कारोबार अर स्टार्टअप ने बधावो दे र ई हलका मांय दक्षता बधा र खेती ऊं बत्तो फायदो लेवणो है। 2 साल रा ई कोर्स मांय दाखिला सारू उम्मीदवार किण ई संकाय मांय 50 फीसदी या बत्ता नम्बर ऊं स्नातक व्हेवणो चाहिजे। आरक्षित श्रेणी रा उम्मीदवारां सारू स्नातक मांय कम ऊं कम 45 फीसदी नम्बर व्हेवणा चाहिजे।

000

राज्य मांय आज ई न्यारी-न्यारी ठौड़ां बिरखा व्ही। भीलवाड़ा मांय सिंज्यां री पोर बिरखा व्ही जद के जयपुर मांय दोपहरां पाछे कठे-कठे बौछारां पड़ी। ई बीचे मौसम विभाग आवता 48 घंटां मांय राज्य रा उत्तराद अर ऊगणी हलकां मांय बिरखा व्हेवण रा आसार जताया है। महकमो आज जयपुर, दौसा, अलवर, करौली, भरतपुर, धौलपुर, श्रीगंगानगर अर हनुमानगढ़ जिलां मांय कठे-कठे मध्यम ऊं तेज बिरखा रो ऑरेंज अलर्ट जारी कीनो है। ई दौरान कठे-कठे बीजळी पड़बा अर 30 ऊं 40 किलोमीटर प्रति घंटा री रफ्तार ऊं बायो बाजण री संभावना है।

000

जैसलमेर रा जिला कलेक्टर प्रताप सिंह अहलकारां सागे मीटिंग कर र आकांक्षी जिला अर चयनित ब्लॉक फतेहगढ़ मांय कर्या जा रह्या कामां रो जायजो लीनो। जिला कलेक्टर चिकित्सा विभाग, महिला अर बाल विकास विभाग, शिक्षा विभाग अर राजीविका रा संकेतकां री प्रगति रो जायजो लेता थकां मुख्य चिकित्सा अर स्वास्थ्य अधिकारी ने चिकित्सा विभाग ऊं जुड़्या संकेतकां रा काम तैय बगत मांय पूरा करण रा हुकम दीना। वे शुगर अर बी.पी. रा मरीजां री ठा करण रा काम ने तेज करण सारू आशा अर ए.एन.एम. ने घर-घर जा र जाणकारी हासिल करण रा हुकम दीना।

000

प्रदेश मांय नान्हा टाबरां रा स्वास्थ्य मांय सुधार लावण रा मकसद ऊं काल स्तन पान सप्ताह सारू कर्यो जावेला। ई सप्ताह री थीम "क्लोजिंग द गेप : ब्रेस्ट एंड फीडिंग सपोर्ट फॉर ऑल" राख्यी ज्यी है। केन्द्र सरकार कानी ऊं प्रसव केन्द्रां माथे बच्चां रा जन्म पाछे बेगो ई दूध पावण

अर नुवी मायडां ने मदद देवण माथे ध्यान देता थकां ई सप्ताह रा तैत न्यारा—न्यारा कार्यक्रम राख्या जावेला ।

000

महिला अधिकारिता विभाग री ओर ऊं चलाया जा रह्या एक सौ दिन रा खास जागरूकता अभियान रा तहत बूंदी मांय टाबर टाबरियां ने पोक्सो कानून रा बारा मांय जाणकारी दीरीजी । कार्यक्रम मांय महिला अधिकारिता विभाग री ओर ऊं चलाया जा रह्या इन्दिरा महिला शक्ति केन्द्र री केन्द्र प्रबन्धक उद्यम प्रोत्साहन योजना अर अमृता हाट रा बारा मांय ई जाणकारी दीनी ।

000

जोधपुर रा संभागीय आयुक्त बी. एल. मेहरा आज बिलाड़ा हलका रो दौरा कीनो । वे पिचयाक ग्राम पंचायत परिसर मांय पौधा रोप्या । वे पंचायत समिति मांय अन्नपूर्णा रसोई केन्द्र अर तहसीलदार रा दफ्तर रो दौरा कर र व्यवस्थावां रो जायजो लीनो ।

000

भ्रष्टाचार निरोधक ब्यूरो री ओर ऊं चलाया जा रह्या जागरूकता अभियान रा तहत आज सवाईमाधोपुर मांय भ्रष्टाचार मुक्त राजस्थान जन संवाद कार्यक्रम राख्यी ज्यो । इण मांय ब्यूरो रा अतिरिक्त पुलिस अधीक्षक, सुरेन्द्र कुमार शर्मा कह्यो के भ्रष्टाचार ने जड़ ऊं मिटावण सारू जनता री मदद जरूरी है । वे ट्रेप कार्यवाही, ओहदा रा बेजा इस्तेमाल, औचक जांच अर आमदनी ऊं बत्ती संपत्ति रा मामलां ऊं जुड़ी कार्यवाही रा बारा मांय ई जाणकारी दीनी । शर्मा कह्यो के सरकारी सेवकां कानी ऊं घूस मांगण री शिकायत भ्रष्टाचार निरोधक ब्यूरो रा दफ्तर रा फोन नम्बमाथे या ब्यूरो रा अतिरिक्त पुलिस अधीक्षक सामी करी जा सके है ।

000